



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Sa particula miraculosa

Fiat su lunis de Pasca, e cumentì dònna annu, sa crèsia manna fiat prena de genti, ca fiat andada po ascurtai sa missa acanta de s'altari majori, innui s'arretori fiat tzelebrendi e devotus meda e devotas puru fiant abetendu po si comunicai.

Su predi, arribau a sa comunioni, amostat a totus sa particula, apustis ndi calat de sa brandiglia, acumpangiau de is ddus preideddus, ca bitiant is ddus cereus allutus.

Incumentzat a donai sa comunioni, unu, ddus, tres iant giai arriciu s'òstia benedita, ma candu su de cuatro est prontu a dd'arriciri, sa particula bolat de is manus e nci arruit in terra, intzandus su predi s'incrubat po ndi assoddiri sa particula e birit ca est arrèscia in sa lastra.

Su predi incumentzat a circai de ndi-dda bogai ma cantu prus issu circat de ndi-dda tirai aforas cantu prus cussa si nci stichit aintru. Candu iat biu ca non nci-dda fadiat iat pigau un'àtera particula e si fiat acostau a s'òmini ca fiat abetendi, ma custa borta puru dd'est arruta s'òstia.

Intzandus s'arretori s'incrubat torra po ndi boddiri sa particula ma custa borta puru s'est atacada a sa lastra e s'est atacada aici meda ca su predi non nci arrennescit nimancu imui a ndi boddiri s'òstia.

Intzandus su predi cumprendit ca cuss'òmini non fiat dighu de s'acostai a sa comunioni, poita iat aguantau cuau calincunu pecau mannu a su cunfessori. S'arretori no iat sighiu prus a donai sa comunioni a cuss'òmini e, sa diri apustis, iat tzerriau su piscamu de Ales po di contai su chi fiat sutzèdiu.

Su piscamu ddi narat de ndi assoddiri is duas òstias de terra e de ddas ponni aintru de unu annundeu.

Deu puru apu pòtziu biri is dduas òstias, mi-ddas at amostadas s'arretori ca ddas amostat a totus is chi ddas bolint biri. Sa diri etotu ca est suzèdiu su miràculu in Mògoro sutzediat su matessi in sa tzitadi de Siena innui est nàsciu Santu Bernardino ca est su patronu de Mògoro.

In diri de oi est allogada in sa crèsia de Mògoro una perda innui funt arrèscias aintru dduas òstias ca parit chi siant cussas de su miràculu.

Su lunis de Paschixedda si fait una grandu professoni po arregordai cussu miràculu de importu mannu e is fidelis funt sèmpiri presentis.